



火黏蟲

這幾年，見到國曆四月中到五月初係油桐花開个季節，同時又係僑等中部火黏蟲大出个時節，苗栗、臺中假山个所在，有當多生理人用「日時頭賞桐花、暗晡頭探火黏蟲」个活動來廣告，錫來臺灣各地个人客。在這段時間，中部地區个觀光景點日日人尖人，也同這兜生理人个錢袋塞淦淦。滿山蓬白个油桐花開，正經係當靚个風景，到暗昏了後歸陣个火黏蟲又會帶分人客無共樣个享受。因致恁泥，人客看花、賞火黏蟲笑咪咪，生理人算錢也算去牙晒晒。

火黏蟲對吾等這兜莊下細人來講實在無麼个，斯像春天開花、秋天落葉恁自然。記得僮做細人該下，熱天食飽夜，阿姆還在灶下撿掣，阿爹、阿奶擎核葵扇在禾埕坐涼、打嘴鼓，阿哥斯會帶緊僮同老弟捉火黏蟲搞。該當時个火黏蟲，滿哪都係，禾埕項斯看得著，成半下還會飛入屋家肚去，在電火下飛來飛去。

阿哥个先生識講古分厥等聽，講頭擺有一個細人當想愛讀書，毋過屋家當匱，無錢好點燈盞分佢看書，佢斯走去捉當多火黏蟲裝在細麻紗布袋肚，用火黏蟲个光來讀書，後來佢大漢咧斯當有成就。阿哥也想愛捉火黏蟲來做電火，斯湊僮同老弟共下去屋背个菜園捉火黏蟲。屋背暗摸胥疏，還有各種吱吱嘎嘎个蟲、蚊噉聲，當得人驚，僮同老弟揪核阿哥个衫尾，驚都毋敢放火氣，一步一步耐到菜園，看著歸菜園做下係躡上躡下个火黏蟲，比天頂个星還較多、還較靚，吾等歡喜去咻咻滾，暢都耐毋得。

吾等捉著幾下十隻火黏蟲，飄轉屋家愛同阿姆展寶，無想著阿姆一下斯喊吾等同火黏蟲放撇，阿哥毋肯，僮同老弟也毋盼得，想同歸油紙絡个火黏蟲放在間肚，看有影毋使點電火無？阿姆講：「使無得捉火黏蟲，遽遽同火黏蟲放撇啦！若無，若等暗夜睡目斯會拉尿喔！」吾等聽著，驚拉尿分人笑，斯遽遽走去禾埕同火黏蟲放撇，看核一隻一隻火黏蟲躡啊躡對油紙絡肚慢慢飛出來，飛對暗暗个圍牆背去。第二日打早，吾等三個做下無拉尿，對該擺起勢，吾等也毋識過去捉火黏蟲來搞咧。

這下回想起來，實在愛阿腦阿姆个智慧，若無騙吾等講捉火黏蟲會拉尿，該當時毋知會分吾這兜損撇幾多火黏蟲哩！

作者：徐姿華

☆詞彙學習☆

【火黏蟲】fo^ˊ ngiam^ˇ chung^ˇ：螢火蟲。

【展寶】dien^ˊ bo^ˊ：現寶。

【咻咻滾】hiu⁺ hui⁺ gun^ˊ：大喊大叫。

【損撇】sun^ˊ ped^ˊ：損毀、損壞。

【油紙絡】rhiu^ˇ zhi^ˊ log^ˋ：塑膠袋。

☆文法學習☆

【對……起勢】dui^ˋ……ki^ˊ shi^ˋ：從……開始。「對」為表示移動趨向的介詞，同時具有「從」和「往」的意思，如文中的「對油紙絡肚慢慢飛出來，飛對暗暗个圍牆背去」即指「從……飛出來，飛往……去」。除了空間上的位移，「對」也可用在時間方面，指從某個事件或時間點開始，如文中的「對該擺起勢（從那次開始）」。